

Al-aaf

Op Inne dusj zitte
In de hook van de café
Inne kloon en 'ne indiaan
Oetgeblus neëve ee
Dreuvig, melancholiesj
De sjmienk verzwit
Trikt vermeujde sjpeur
Uëver 't gezicht
't Inj van drie dul daag
Bie hun is 't biste draaf
De aafmarsj vuur de prins
Ze winke heuëm 'n meug al-aaf

Wiel Roeselers.

Anger gezègkdes - 04

- Eene dae good huuërt ka toch een doof noeët zin.
- Mèt gòw zökke aa kan me toch eene erme sjtank berves zin.
- Me hoeft neet krank te zin òm de vot noagedraage te krieëge.
- Me hoof neet van een hoon te zin om ee sjnoeëterkuuke te zin.
- Ooch zjwarte luuj kènne garverf krieëge.
- Me hoof neet noa de kirk te goa òm zich aan de duuvel te biechte.
- Me hoof gene voeëgel te zin òm aesterooge te hóbbe.
- Eene sjaag in ee fietseraad is neet zoeë erg e seen sjaag in 't koffer.
- Me kan baeter op d'r loekkas hòwwwe es dat me de klink sjeet.

Lej Dohmen.

Carnaval

Mit carnaval breëk ich oet
Da houd ich 't neet mieë vol in de boet
't blood kruup woeë 't neet goan kin
En hub weer gooie zin
Vieër houte de traditie in ieëre
En goan drie daag carnaval vieëre
Da make vieër sjpas en plezeer
Mit ee sjnepske en good glaas beer
Vieër hoale alles va d'r sjtal
Vuur de auw wiever bal
Driej daag op nul os verstandj
Alle zurg zitte vieër a de kantj
Went de daag da zin vuuerbiej
Zin vieër ooch weer bliej
Went alles weer achter os lik
Veult es of nuuj blood i-mich zit
En mit ee vusjke sjlete vieër aaf
Bis volgend joar alaaf
Esjgoonsdich is alles weer gedoa
Es ich mit ee esjekruutske op heem a goa

Jan van Haaf †.

Meëdje

Ze sjton a gen tieëk
Sjiek age-doa
't Is vasteloavend en ze keek
En lachde i heurzelf
Noe konne ze mich zieë
Allenuj die mansluj hei

De mansluj kieke zich de oge oet
Ze zjwitde ee bietje
Ze woar get opgedrieëd
Ze sjtong doa al 'n tiedje
I Heur kot klidje
Ginne keel houw koeraasj heur
Get te vroage

Jan Halmans

Vasteloavend is..

Vasteloavend is mit al zien bontje kluëre wie inne reëgeboag,
Of luuj dat ooch waal allemoal ziën is meestal de groëte vroag!
Vasteloavend is vaak beëter wie 'n medicien,
't verzach in jieder geval de groeëtste pien!
Vasteloavend hilt dich inne sjpegel vuur,
't gieëf doa mit de luuj een realiteitskuur.
Vasteloavend liet dich vergeëte de alledaagse sjleur,
En zurgt doa mit vaak vuur een good humeur!

Ron Logister.

't Sjpasorkest

In 't groeëte sjpasorkest
Deed jieëkeree zien best
't weeët gezónge en gesjprónge
durch de ouwe en de jonge
en gebloase oet volle bros
alle remme gunt dan los
Tante Net blieëst klarinet
en nónk Toon blieëst saxofoon

Zoeë trekke ze dan durch sjtroate
óm zich uëveral huure te loate
Vanaaf de elfde van d'r elfde
al joare lank 't zelfde
En jieëkeree zingt mit
en rammelt mit zien koenstgebit
't Marie blieëst vuur de sjpas
op de groeëte dieke bas

Zoë bloase dan de groeëte
en och de klinge poete
versjil weeët neet gemak
't weeëd zich dan bijeen gepak
en zoeë bloase Winkbule
Same mit de Kirkule
En dunt ze allemoal hun best
In 't groeëte sjpasorkest

Zoë huit d'r Tom
de dieke trom
Trekt d'r Sjuul
aa d'r kwetsjbuul
Sjpieëlt Sjanet
op trómpet
Bloase Meute
op de fleute
ing Marot
blieëst fagot
Hat jieëkeree zien instrument
en allenui zint ze kontent

zónger moeziek geen carnaval
ging zitzung en ging prinsebal
en Tempeleer of Rouweleer
en Marot of Cassinot,
ze dunt allemoal hun bes
in 't groeëte sjpasorkes

Thei Janssen †.